

Planiando pa Hasi Maldat

Promé ku un krímen ta tuma lugá, tin planiamentu...tin bes hopi planiamentu detayá. Talbes e kriminal ta lur e sitio pa simannan adelantá, plania kua arma e lo usa, ki ruta pa kore pa evitá sospecho, kon pa papia ku e víktima, kon pa evitá polis, ki método pa yega na e plaka, èts.

Talbes bo ta hasi méskos? Probabelmente bo no ta plania kometé un krímen. Ma kisas bo ta **plania** hasi piká...

Palabra di Dios ta bisa, “No hasi provishon pa e karni, pa kumpli ku su mal deseonan.” (Romanonan 13:14). Den otro palabra, “no traha plan pa satesfasé e deseonan malu den bo”. Ma loke Skritura ta bisa pa NO hasi, ta nèt loke nos TA hasi. Nos asta ta bai un stap mas aleu i ta pone un fiesta pa nos deseonan malu di “karni” por djòdjò, yamá “karnaval”.

E simannan promé ku Gran Marcha tin hopi preparashon. Sin duda e karosanan lo lusi, e trahenan lo ta kolorido, e desfrás kreativo. Ma den tur e bunitesa, tin planiamentu pa hasi maldat.

Talbes bo ta reklamá ku nos palabranan no ta bèrdat? Si no ta bèrdat, pakiko komishon di AIDS ta parti kondon durante e fiesta sensual? Si no ta bèrdat, pakiko ta papiá di beibi ku ta nase mas den fin di aña komo “yu di kanaval”?

Si no ta bèrdat, pakiko desnudes ta un problema den karnaval? E tendensia ta pa mira kon tiki tela por kubri kurpa. Modestia i karnaval ta dos palabra ku no sa aparesé huntu. Si no ta bèrdat, pakiko tin problema ku baliamentu vulgar? Si no ta bèrdat, pakiko líriko di hopi tumba tin mas ku un sintido?

Si no ta bèrdat, pakiko alkohòl i karnaval ta inseparabel? Hende ta purba haña kurashi den un bleki òf bòter pa hasi siertu akto ku nan no sa hasi normal...òf pa ferdof nan konsenshi.

Talbes tin hende ku ta partisipá sin maldat den mente. **Ma no tin duda ku hopi parsipante ta deseá pa gosa un tiki piká!**

Di bèrdat, piká ta e filosofia tras di karnaval. E idea ta ku hende mester komportá nan durante kuaresma. Pa bo por evitá di hasi maldat durante e kuarenta dia aki, tin karnaval...pa hasi tur bo piká **promé**—pa bo kana di maldat yena **promé**...

Esei ta un filosofia diabóliko! E ta un preskripshon pa promové mas maldat! **Nunka hende ta siña baha man na maldat dor di hasi maldat...**ni asta 1 dia den aña! Nos nunka ta bisa e ladron pa hòrta 1 dia pa e por keda sin hòrta e siguiente 40 dia. Nos nunka ta bisa e drogadikto ku e manera pa kibra ku droga ta dor di usa hopi un dia, anto e por domin'é despues. Pakiko anto nos ta pensa ku esei ta pusibel ku deseonan sensual? **Dios Su plan ta pa bisa “nò” na piká TUR DIA den aña! PUNTO!**

Hopi hende ta bati alarma preokupá ku nos ta pèrdè nos normanan i balornan. Ma durante Karnaval, trankil e mésun hendenan ta lubidá tur e normanan i balornan ku nan ta pretendé di apresiá asina tantu. Laga nos ta sinsero. Ta hipokresia pa reklamá e dekadensia den nos komunidat 364 dia si bo mes ta promové dekadensia 1 dia den aña!

For di tempu ku karnaval ta kaba, ya hende ta plania kon nan por djòdjò den piká otro aña. Ma nan no ta kontentu pa gosa piká nan so. Nan ta tan fanatiko di e gran fiesta libertinahe ku nan tambe ke siña nan mes yunan inosente fo'i chikitu pa hiba bidanan parotín. Ki sorto di norma i balor nan ta siña e generashon hóben?

Palabra di Dios ta bisa, “..No pèrmití piká reina den boso kurpa mortal, asina ku boso mester obedesé su pashonnan, i no sigui presentá e miembronan di boso kurpa na piká komo instrumèntnan di inhustisia, ma presentá boso mes na Dios...” (Romanonan 6:12-13). Djis ta karnaval. **Dios ta rogábo pa duna bo mes n'E na lugá di plania pa hasi maldat!**